



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 6



Niger coup lenirtemi yimsüsüba melenteptsü asoshi küm asem benokdang

Manipur assembly session mayongba atema Congress mepelar



VOL. XX NO. 309 (ADOK 309)

DIMAPUR TENTONÜ (MONDAY)

LUROI (AUGUST) 21, 2023

₹ 5.00

NSCN-i prangpong agütsüba ken o bushisüngdang

Dimapur, August 20, 2023 (TYO): Manipur nung Naga Army Private H. Khosiivei Lovingson Roah-i telungpurtem nem prangpong agütsüba dak sendakba nung Deobarnü osang tasen kar angazüker.

Indian security forces-i chiokba sülen Naga Army-i Roah dang asüngdangya asüdüng pa nem sempet dalang agütsür chiokba bushitetogo ta MIP, Government of the People's Republic of Nagalim (GPRN) sangdong ka nung ashi.

“August 15, 2023 nü Lamlong, Imphal East nung sepaitemi pa apu aser

Chingmeirong, Imphal adena orr aliba army tesep kati pa anir aoba Roah-i ashi” ta MIP sangdong nung shia lir.

“Pa ya Koirengkei aser Mantripukhri tsüngda aliba Army Camp kati anir ao aser idakji pa kanga reshikangshi asüba agi tetsübu nung pai camera tsüngdang jembii. Sepaitemi ashiba manga nungbo pa talila reshikangshitsü ta amokmeren” ta MIP-isa ashi.

Manipur nung Meitei-Kuki-Zo mepetmes nung Indian Security Forces-i NSCN tenüing menüksütsü atema iba mapa inyaker ta MIP, NSCN-isa metetdaksüo.

Manipur osang tai belenshi: PRO (Defence)

Dimapur, August 20, 2023 (TYO): August 19, 2023 nü The Sangai Express nung “Kuki telungurtemi injang khaloktsü” ta ser osang ka adokba nung matalokba aika zülua lir, ta PRO (Defence), Kohima & Imphal-i metetdaksüo.

August 18, 2023 nü Kuki telungpurtemi Torbung Sabal Lekai nung aliba parnok bunker nungi Phougakchao Ikhai Mamang Lekai tsütsü injang khaloktsü. Idangji Central security forces-i yimdaklirtem noktang saka Kuki dangbo kecha mashi ta osangkaketi shiogo.

Ajisüaka Security Forces dak tai tongloksübaaji tiyazü aser kuli kecha mali. Iba ya tai maketba nisungtem tangatetba melendaksütsü aser otsü tiyazü purateta Security Forces tenüing menüksütsü merangba mapa ka dang lir ta PRO (Defence)-i sangdong ka nung ashi.

August 18, 2023 anepdang 4:30 ako meta single shots 4 khatok aser iba ya ozüing alema inyakerteri amshiba drone ka

dak khaloktsüba liasü. Iba drone ya Kuki nung yimtsüng ka tema nung amshi. Iba tatalokba sülen ano anepdang 8:30 meta ka Phougakchao nung mapa lemezüka aliba Indian Army column kati drone ji angu aser iba drone amshisang indang tenüing aser noksa Phougakchao Police Station nem agütsü, ta PRO-isa ashi.

The Sangai Express-i iba tatalokba indang osang tai prokshio. Parnoki tebilemstü kecha mebeni aser kulitem mebushitepi Security Forces tenüing menüksütsü atema tasa atonger osang prokshio go ta parnokisa metetdaksüo.

Indian Army-i Manipur nung shinga tsütsü tejak meshii yimjung bener arutsü atema tenangzükba agir inyaker. Anungji media house tem dang tatalokba osang shitak prokshitsü aser Security Forces-i Manipur nung yimjung bener arutsü atema inyakba mapa nung yariteptsü mepishir, ta PRO (Defence), Kohima & Imphal-i metetdaksüo.

Assam tesayurtem atema dress code metetdaksü

Guwahati, August 20, 2023 (Agencies): Assam nung Department of Higher Education-i higher educational rejutem nung tesayurtem atema dress code ka sayaogo.

Shisaliok rejutem nung tesayurtemi sübosulemstü timi agitsü atema department-i iba tetuyuba agütsü.

Tesayurtem kaketshir taküm aser tangatetba melenshitsuasa shilem agir anungji tesayurtemi mapa inyakdak süoshi tejaksa aser kidang asema magitsüla. Tesayurtemi sentüsü mesangwaba süoshi temerük

aser tajung asemstüla ta Department of Higher Education-i metetdaksüo.

Tesayur kari lokti den mapetba süoshitem agir ta tebilemstü kar lemsatepba sülen department-i dress code metetdaksü.

Iba dress code ya tebur aser tetsürtem atema balala agüja lir. Tebur tesayurtemi formal attire, formal shirts with pants mesüra dhoti-pyjama ama sobaliba sübotsü agitsü.

Tetsür tesayurtemi salwar suits, sarees, mekhela chadors aser tanga sobaliba subotsü agitsü.

July 29, 2023 nü 'A Call to Goodwill' ayonger

Dimapur, August 20, 2023 (TYO): Tongtipang Naga arogotem, Naga civil societies aser Forum for Naga Reconciliation (FNR) ajanga July 29, 2023 nü 'A Call to Goodwill' sangoktsüo.

“Manipur mepetmesü ajanga Naga nung ali aser loktiliba nung kongshiba atema asenoki shisadangtsüla. Naga nung aser sasep nung telemsa madoktsü atema asenok kanga kümdanga alitsüla. Naga nungeri tesempatep aser tebilemba tamajung nungi

pilaa alitsü nenshir” ta Forum for Naga Reconciliation (FNR)-i sangdong ka nung metetdaksü.

“Naga nung ali aser tesemtem nung azütokshitepba nungi pilaa alitsü, otsü meyanglutsü, tiyazü meprokshtsü, nisung kar anema meinyaktsü mesüra nisung meyrutsütsü ta asenoki nangzüksüla” ta FNR-i ashi.

Tesempatep aser ozüing alema inyakba tensa ka nung asenoki yimjung aser tangatetba tajung sayutsüla. Asenoki aremzüksüla aser ajak dang

tematiba asenoki Tsüingrem dak akangakanga amangtsüla. North-East nung alirtem yimjung aser tangatetba tajung ajanga dang talenba nungi salatsü aser ibaji asenok teimla lir ta parnokisa metetdaksü.

Naga yimten teloktem, Naga loktitentet aser kija ajaki iba tayongzükba sülen anidaktsü mepishir aser iba ama tensa tamajung ka nung yimjung abenertem asütsü ayongzükker ta Naga Arogo, Naga CSOs aser FNR-i metetdaksüo.

Kuki-Meitei rara nung NSCN(IM)-i shilem agiba ashishir: WKZIC

Imphal, August 20, 2023 (Agencies): Manipur nung Thowai Kuki Village anasa Sipijang nung lendong atalokba ya Kanglei Yaol Kanna Lup (KYKL) aser Manipur Naga Revolutionary Front (MNRF) ajanga inyak ta Kuki-Zo nungeri ashir.

Iba lendong nung tai maketba takümtem laluo go aser NSCN(IM)-i Meitei nung nem prangpong agütsüba atema tasüngdangba adoker ta World Kuki-Zo Intellectual Council (WKZIC)-i metetdaksüo.

Telungpur teloktem longjemer Kuki-Zo nung amakba atema

jashir. August 18 lendong nung Jamkhogin Haokip, Thangkhokai Haokip aser Hollenson Baite nung kaset ta WKZIC-i ashi.

NSCN(IM)-i Meitei nung nem prangpong agütsüba osang atema tebilemstü abener. Meitei aser Tangkhul teloktem yaritepa Kuki-Zo nung samatsütsü meranger ama onoki ajiteter. Anungji Naga civil society teloktemi MNRF lenirtem den jembitsüla aser parnoki inyaksangshiba azüoktsüla, aji ta mesüra tarutsü nung parnoki inyakba mapatem asoshi sasatsü ta WKZIC-isa metetdaksü.

Iba lendong nung MNRF-i

shilem agiba atema aoksar aser United Naga Council (UNC) Manipur o Kuki Inpi Manipur (KIM) yaritepa kin o kin tsüngda tesentaktep meraksatsü atema inyaktsü ayongzükker, ta parnokisa ashi.

Mapang shitak nung inyakba ajanga lendong tulu nungi kümzükker anungji sendaktepa alir ajaki tasa tamajung anema longjemer noktaksü ayongzükker. Khristan aser lisopurtem tsüngda alemli nungi telongjem, yimjung aser tesentaktep tajung nung liyonga aruba meraksatsüla ta WKZIC-isa metetdaksüo.

Congress Working Committee (CWC) nung NE nungi nisung 4 lir

New Delhi, August 20, 2023 (Agencies): Indian National Congress nung tematiba telok Congress Working Committee (CWC) nung Northeast nungi nisung pezü shimokogo.

Par asem ya Gaurav Gogoi, Lalthanhawla, Gaikhangam aser Sudeep Roy Barman nung lir.

Congress President Mallikarjun Kharge-i aniba CWC züngsemtem sayaba nung aika ajangshia arurtem, mongintem aser tesem rangloker nübotem shimoka lir.

2024 Lok Sabha election magidang February 24-26 tashi Raipur, Chhattisgarh nung INC 85th Plenary Session nung lemtet agiba sülen tanü CWC züngsem shimba osang metetdaksüo.

INC-i CWC atema elections magitsü aser president Mallikarjun Kharge-i dang nisungtem shimoktsü lemtetogo ta Congress communications tanishir Jairam Ramesh-i iba mapang metetdakja liasü.

CWC nung Shashi Tharoor aser Sachin Pilot na densema lir aser iba ajanga tenati party asalentong o policy tem yangluba nung shilem agiba jangjashir.

CWC Members:

- Mallikarjun Kharge, 2. Sonia Gandhi, 3. Dr. Manmohan Singh, 4. Rahul Gandhi, 5. Adhir Ranjan Choudhary, 6. A K Antony, 7. Ambika Soni, 8. Meira Kumar, 9. Digvijay Singh, 10. P Chidambaram, 11. Tariq Anwar, 12. Lal Thanhawala, 13. Shri Mukul Wasnik, 14. Anand Sharma, 15. Ashokrao Chavan, 16. Ajay Maken, 17. Charanjit Singh Channi, 18. Priyanka Gandhi Vadera, 19. Kumari Selja, 20. Gaikhangam, 21. N Raghuvveera Reddy, 22. Shashi Tharoor, 23. Tamradhwaj Sahu, 24. Abhishek Manu Singhvi, 25. Salman Kurshid, 26. Jairam Ramesh, 27. Jitendra Singh, 28. Randeep Singh Surjewala, 29. Sachin Pilot, 30. Deepak Babaria, 31. Jagdish Thakor, 32. G A Mir, 33. Avinash Pande, 34. Deepa Das Munshi, 35. Mahendrajeet Singh Malviya, 36. Gourav Gogoi, 37. Syed Naseer Hussain, 38. Kamaleshwar Patel, 39. KC Venugopal

Permanent Invitees:

- Veerappa Moily, 2. Harish Rawat, 3. Pawan Kumar Bansal, 4. Mohan Prakash, 5. Ramesh Chennithala, 6. BK Hariprasad, 7. Prathiba Singh,

- Manish Tiwari, 9. Tariq Hameed Karra, 10. Deepender Singh Hooda, 11. Girish Raya Chodankar, 12. T Subbarami Reddy, 13. K. Raju, 14. Chandrakant Handore, 15. Meenakshi Natarajan, 16. Phulo Devi Netam, 17. Damodar Raja Narasimha, 18. Sudeep Roy Burman

Incharges:

- Dr. A Chellakumar, 20. Bhakta Charan Das, 21. Dr. Ajoy Kumar, 22. Harish Choudhary, 23. Rajeev Shukla, 24. Manickam Tagore, 25. Sukhvinder Randhawa, 26. Manickrao Thakre, 27. Rajani Patel, 28. Kanhaiya Kumar, 29. Gurdeep Sappal, 30. Sachin Rao, 31. Devender Yadav, 32. Manish Chatrath.

Special Invitees:

- Pallam Raju, 2. Pawan Khera, 3. Ganesh Godiyal, 4. Kodikkunil Suresh, 5. Yashomati Thakur, 6. Supriya Shrinete, 7. Priniti Shinde, 8. Alka Lamba, 9. Vamshi Chand Reddy.

Ex-Officio Members:

- Srinivas BV - President, IYC, 11. Neeraj Kundan - President, NSUI, 12. Netta D'souza - President, Mahila Congress, 13. Lalji Desai - Chief Organiser, Sevadal.

7 buba WTCC, Chennai nung Nagaland Angh aden



7 buba Annual Medical Excellence Award of World Tamil Chamber of Commerce (WTCC) sentong nung tangokba noksa angur.

Dimapur, Luroi/August 20 (TYO): 7 buba Annual Medical Excellence Award of World Tamil Chamber of Commerce (WTCC) sentong ya Chennai nung August 19, 2023 nü agia liasü, kong Nagaland Angh La Ganesan tongti tesemdang liasü.

Iba sempet agütsüba sentong nung jembidang, pei asoshi mebilemi nisung kumzükertem nem tetushi agütsüba sentong nung adenba asoshi pelar, ta Angh-i ashi.

Anema aliba ya rongsen tulutiba lir aser doctor temi pei kibong indang mapang bendanga agütsür nüburtem anema lidaktsütsü asoshi pei takum bendanga agüja inyaker aser takum alirtem ajak temang kumzüka ayutsü asoshi mapa tajung inyaker, ta Angh La Ganesan-i ashi.

Küm shia tajungtiba rongnunga tajungtiba jangjateta iba ama konang tetushi agütsüba atema pai Global Organization of Tamil aser World Tamil Chamber of Commerce tir, Selvakumar nem tenüngsang agütsü.

Nisung ajak nembo konang tetushi magütsüetataka iba sempet angurtem aser medical professionals ajaki tajungtiba nung inyaksü ajungmesotsü.

Doctor tem nem akhum

agüja jembidang, COVID-19 pandemic mapang nisung ajak iba tashidak menatsü tetsübo nung pei ki alema malui alidang, health ketdangsür temi pei takum bendanga agütsür tasü ita nisung lakh aika takum kumzüka ayu, ta Angh-i ashi.

Anibelem mesasai inyakba doctor, nurse aser danga paramedical professionals nem tenüngsang agütsütsü asen mapa lir, ta pai ashi.

World Health Organization ajanga ashiba agi, nisung 1,000 asoshi doctor ka alitsüla, saka India nung nisung 834 asoshi doctor ka lir aser ibai India nung medical tsütsü takok tuluka amai züngshir, ta Nagaland Angh-i ashi.

India kübok yimti tulutem nung mozüki tajungba kuma alima den lirumedema renloker aser Artificial Intelligence amshia tashidak puteter aser anepalur, ta pai ashi.

Shiranger anepaluba, talisa temolungjang tashidak anepaluba, IVF treatment aser tenük-telen melenba aser India nung item anepaluba jenjang ya danga developed countries den medemdangra ashilem ter nung ka agi tajemba lir, aser iba yongji 'Medical Tourism' temaba jenjangi ajungketer, ta pai ashi.

Taoba küm pongu tsüngta Medical Tourism ya shilem 200

jungnüa agi tali kumogo.

Asen Ato Kilonser Narendra Modi lenisüba kübok tangbo alima nung healthcare scheme tulutiba Ayushman Bharat scheme, India nung lir, ta ashi.

Iba scheme yagi India nung crore 50 dak tema teyari angur. Makamaiter aser lower middle class pur tem tangbo jenjang talang yong healthcare tajung agiteter, ta Nagaland Angh-i ashi.

Linük tesem ajungalen nisung takum kumzükba nung bendanga agütsür inyakba aser shiranger nem healthcare tajung agütsüba asoshi pai doctor tem nem akhum agütsü aser pelaba lemsatepa liasü.

Iba sentong nung pai sempet angurtem nem trophy aser memento agüja liasü aser Medical Excellence Directors semzükja liasü.

Iba sentong nung Medical Director, Sree Balaji Medical College and Hospital, Prof.D.R Gunasekaran aser President, Tamil Nadu Medical Practitioners Association, Prof CMK, Reddy nungeria jembia liasü.

President, World Tamil Chamber of Commerce, Selvakumar ajanga tarur pela agizükba o jembi aser Dr.V Sathyanarayanan ajanga melepzüng o jembi.

Kharge-i Congress Working Committee yanglushi

Guwahati, Luroi/August 20 (Agencies): Deobarnü Congress tir Mallikarjun Kharge-i Congress Working Committee (CWC)

züngsemtem shimshia Assam MP Guarav Gogoi densema züngsem tasen kar inoksemogo.

Iba Committee züngsem rongnung nübu tasen temji Sachin Pilot, Shashi Tharoor, taoba Punjab CM Charanjit Singh Channi, Anand Sharma aser Assam nungi Gaurav Gogoi alitsü.

Congress Working Committee nungya ano Naseer

Hussain, Alka Lamba, Supriya Srinate, Praniti Shinde, Pawan Khera, Ganesh Godiyal, Yashomati Thakur nungertema lir.

Iba list nung Veerappa Moily aser Manish Tewari ya 'permanent invitees list' nung lir.

Gaurav Gogoi ya tang Lok Sabha nung Congress indang Deputy Leader ka ama inyaker. August 3 nü Assam nungi Lok Sabha MP Gaurav Gogoi ya aruya aliba Rajasthan assembly elections atema screening committee nung mendenpuba shima liasü.

ATMA Kobulong Block ajanga training balala agütsü



Dimapur, Luroi/August 20 (TYO): Ak metsüba yimya tajungba angazükdaksütsü aser ak tali metsütetsü mechi Agricultural Technology Management Agency (ATMA) Kobulong Block, Mokochung ajanga August 19, 2023 nü Longpa yimdak "System of Feeding and Biosecurity in Swine" onük nung ajemdaker training agüja liasü.

Iba training nung shisalen sayur ya Dr.Chubasanen, District Livestock Development Officer & General Manager, Mini Dairy Plant, Mokochung liasü.

Pai jembidang training nung angazüktsü tejangraba nung adentsü aser angazükbatem mapa kuma amshitsü ayongzüka liasü.

Ak metsü metenzük dang sentong kanga junga yanglutsü tongtipang lir, ta pai ashi.

Shisalen sayuri ak nem yimya balala nung chiyongtsü agütsüba indang rasaa ashi aser tajangzük balala aliba mechi company-i yangluba chiyongtsütem inoker agütsütsü ayongzüka liasü.

Paisa farm nung mesen aser tashidak nungi ak kumzüka ayutsü mechi biosecurity mera tem agitsü shia liasü.

Ak ki nung mesen tepsettsü asoshi Potash solution yangluba aser amshiba indang training agüja liasü. Kasa training nung ak dak aliba mesen tepsettsü, ak anepalutsü aser ketdangtsütsü

indang yimyatema sayua liasü.

Iba sülen ak metsürtem den sensaksemba mapang agia liasü aser Village Council Chairman, Nungsang Aier ajanga tepela o jembia sentong tembang.

Sentong temer ak metsürtem nem Potash aser dewormer lema agütsü, kong ak metsür nisung 22 dena liasü.

Maneni Agricultural Technology Management Agency (ATMA) Kobulong Block, Mokochung ajanga Longpa yimdak August 19, 2023 nü "Production Technology of onion" indang inyakyim sayua liasü.

Aluyimer nem lasüng (onion) lu ayimba ajanga tajangzük anguba aser tajungba nung ayimtsü asoshi shisa agüja iba sentong ya ayongzüka liasü.

Iba sentong nung shisalen sayur ya C.Amongla Jamir BTM, ATMA liasü aser lai ashiba agi, linük nung achitsü aser danga linüktem nung ayoktsü asoshi lasüng ya commercial crop tongtipang ka lir.

Lai 'nursery bed' (tila asüidang) kanga junga anepalutsü ashi aser kasa mapang metsü yokba yimyatem, ali renemba, tzü agütsüba, tawa ayuba, ai indokba, ali temu amshiba, ali nungi agiteta aser rizünga ayuba indang rasaa ashi aser mapa agi inyaka sayua liasü. Iba sentong nung aluyimer 11 aden aser sentong temer lasüng metsüjang agüja liasü.

NDPP 29 Jangpetkong AC office lapokogo



Mangkolemba nung NDPP 29 Jangpetkong AC ketdangpur tasen shimokba sentong ka August 19, 2023 nü agidang tangokba noksa ka nung NDPP 29 Jangpetkong AC ketdangpurtem aser NDPP Mokochung Region ketdangsürtem angur.

Dimapur, Luroi/August 20 (TYO): Nationalist Democratic Progressive Party (NDPP) 29 Jangpetkong Assembly Constituency ketdangpur mapa nung shimokba sentong ka Mangkolemba nung August 19, 2023 nü agia liasü, kong NDPP District President, Mayangnungba aser party lenirtem aika aden.

NDPP 29 Jangpetkong AC office nung Aodangnok Ozukum ya tir asütsü.

Kasa sentong nung pa den külemi inyaksüpur tatong tir, tongti zülur aser secretaries tem nem NDPP President, Chingwang Konyak-i meyongnem agüja aliba parnok shimba shiti amokja liasü.

Iba sentong nung jembidang

Mayangnungba-i ketdangpur tasentem dang NDPP indang mangdang nung nüburtem tenzüktsü ajungshia liasü.

NDPP ya 'cadre based party' ka lir, kong yimdak yimtsüng nung inyaker temi tongtipang lir, anungji party lenirtemi yimdak yimtsüng nung rangkoktsüla aser NDPP ajanga sangdonga aliba 'Towards a state of excellence' nung takok angutsü, ta pai ashi.

NDPP 29 Jangpetkong AC tir agizükba o jembidang, NDPP district office nungi ketdangsürtem arua adenba asoshi Aodangnok-i pelaba lemsatep aser tarutsü anogotem nunga yariteptsü ayongzük.

Paisa külem tenzükertem dang tali lungjemer constituency aser Nagaland terenlok asoshi

inyaksü ayongzük.

Sentong nung Mangkolemba Baptist Church pastor, Rev. Mar ajanga ketdangpurtem asoshi sarasademtsü aser Vice President NDPP Mokochung Region, Lipokzulu; Treasurer NDPP Mkg Region, Pangerzulu; President NDPP Women Organisation, Mkg, Arenla Pongen, President NDPP Youth Org. Mokochung, Bendang Walling aser President NDPP Agri & Allied Org, Imsunungsang nungter temia o tatsütsü jembia liasü.

Iba sentong ya NDPP Mkg Region Vice President, Imtiwati lenisüba kübok agi aser NDPP Vice President, Rongsentemsu Lemtur ajanga tarur pela agizükba o jembi.



Tribal Old Age Home cum Day Care Centre ajanga Lenjem Eye Center, Dimapur den lungjemer August 20, 2023 nü teintet rogotem angati tenük repranga liasü. Iba sentong nung teintet rogo 25 angati tenük repranga liasü.



Bhopal, August 20, 2023: Amongnü Bhopal nung Union Home Minister, Amit Shah aser Madhya Pradesh Chief Minister Shivraj Singh Chouhan nati 'Garib Kalyan Maha Abhiyan' tenzüksüba den külemi Madhya Pradesh nung BJP sorkari tesüiba km 20 tsungda inyaktetba mapatem sangdongba mapang tangokba noksa nung angur.

CWC nung Shashi Tharoor aser Sachin Pilot na shimokogo

New Delhi, Luroi/August 20 (Agencies): Amongnü Congress-i party nung telemtetba agiba temaba tentet Congress Working Committee (CWC) nung Shashi Tharoor aser Sachin Pilot na aniokogo; yaküm October ita nung Mallikarjun Kharge party Tir shimba sülen tang mezüing CWC nung züngsem tasen anioker.

Congress Working Committee (CWC) tasenba nung züngsem 39 lir. Taküm Madhya Pradesh, Rajasthan aser Chhattisgarh densema state pongu nung assembly election agitsü aser sangküm Lok Sabha elections agitsü lia CWC nung züngsem tasen anioker.

CWC züngsemtem rongnung Kharge, Sonia Gandhi, Rahul Gandhi, Priyanka Gandhi aser taoba

mapang Ato kilonser Manmohan Singh nungera densema lir.

CWC nungsa Adhir Ranjan Choudhary, AK Antony, Ambika Soni, Digvijaya Singh, Ajay Maken, Anand Sharma aser P Chidambaram nungera densema lir.

CWC nung permanent tejaokertem rongnung taoba mapang union minister ana-Veerappa Moily aser Manish Tewari na shimogo.

CWC nung shimokba sülen Sachin Pilot-i party tangatetbatem tashi itdaksütsü, ta nangzük.

Pilot-i X (taoba mapang Twitter) ajanga, "CWC nung züngsem shimba atema ni Congress Tir Mallikarjun Kharge, CPP Chairperson Sonia Gandhi aser taoba Tir Rahul Gandhi nunger dang pelar. Onok ajak senteper party

tangatetbatem tashi itdaksütsü aser nüburtem den lemsatepsü atema inyaksü," ta metetdaksü.

Congress Lok Sabha MP, Gaurav Gogoi-ia X ajanga party aser linük tenzüksü atema maongka agütsüba atema party Tir aser lenir taintem dang pelaba lemsatet.

Congress MP, Shashi Tharoor-i, "CWC nung ni züngsem shimtsü atema Indian National Congress Tir Mallikarjun Kharge aser Congress central lenirtemi telemtetba agiba atema pelar. Iba ama tongtibang tentet ka nung külem tenzükertem rongnung ni züngsemba atema ni ajemalur aser pelar. Party nung inyakerkem lakh aika medenibo onoki kecha meinyaktetsü. Tanü ajak dak alia ni parnok nem tetushi agütsü," ta metetdaksü.

Uttarakhand nung temeshi aini aorer 7 gari lendong nung asü

New Delhi, Luroi/August 20 (Agencies): Amongnü Uttarakhand kübok Uttarkashi nung temeshi aini aortem bus ka nung lungreni lua tsükokba lendong nung nisung tenet asü aser nisung 27 yiruogo, ta osang ka ajanga metetdaksü.

Lendong atalokba tesem nungji State Disaster Response Force (SDRF) sepaitemi kümzükba maparen inyaka liasü.

Amongnü nikongdang 4:00 ako meta iba lendong atalokba sülen Uttarkashi district magistrate (DM) Abhishek Ruhela aser superintendent of police (SP), Arpan Yaduvanshi na iba tesem jagi oa kümzükba maparen ketdangsia liasü.

Osangbener den jembidang Uttarkashi nung Chief

Developmental Officer, Gaurav Kumar-i, "Gangotri nungi bus ka nung nisung 35 temeshi aini aoba mapang nung Uttarakhand kübok Uttarkashi nung lungreni lua tsükok. Yirua alir 27 kümzükogo aser nisung tenet süogo. Tang kümzükba maparen teinyakdak," ta metetdakja liasü.

Uttarakhand chief minister Pushkar Singh-i district administration dang yirua alirtemji tajungtiba nung anepalutsü aser teyari agütsütsü atema tuyuogo.

Chief minister-i asür kibongtem dang mangyim jashi lemsatet aser yirua alirtem tekeraba nung aneptsü atema sarasademsür, ta lemsatet.



August 20, 2023 nü New Delhi nung taoba mapang Ato kilonser, Rajiv Gandhi asoba anogomong nung lar jala aser Congress lenir Priyanka Gandhi Vadra o la kinungbu, Robert Vadra nati Veerr Bhumi semdanga asür nem akhüm agütsüdang tangokba noksa nung angur.

Kejriwal-i Madhya Pradesh election atema Guarantee card saya

New Delhi, August 20 (Agencies): Taküm küm tatebanglen assembly election agitsü aliba Madhya Pradesh nung Delhi Chief Minister aser AAP tongti lenir, Arvind Kejriwal-i, party-i state nung temelenshi tulu bener arutsütsü, ta metetdaksü.

Amongnü Madhya Pradesh nung Kejriwal-i 'Kejriwal ki Guarantee' card sayatsüogo aser nüburtem dang taruba assembly election nung temelenshi atema par party nem khen maongka agüjang, ta mepishi.

Madhya Pradesh kübok Satna jila nung lokti den jembidang Kejriwal-i, "AAP ya ochi party ka aser linük meimertem lir. Onok ya yimtenren nisungtem masü süaka linük yangertsü atema onok yagi aru. Ni nenok dang onok nem khen maongka agüjang ta mepishir. Nenoki BJP aser Congress amadoktsü, ta ni nenok dang nangzük," ta ashi.

Madhya Pradesh nung Chief Minister, Shivraj Singh Chouhan aija Kejriwal-i, "Pei kinüingertem ashioksüba 'mama' (MP chief minister dang ojala ajar) ka lir ta ni osang angazükogo. Tangbo pa dak mamangtsüla. Tangbo ner jabaso, adianu aser nüko yagi aruogo. Tangbo neko dak dang amangang," ta ashi.

Party balalai manifesto nung tenangzükbatem amadokba dak

sendakba nung Kejriwal-i, "Peipei party manifesto sayar lenirtemia manifesto nung keta alibatemi mazünger, ajisüaka Kejriwal-ibo nangzükbatemi ataloktsür," ta ashi.

Kejriwal-i, MP election nung AAP-i takok ngura shisaliok tsütsü temelenshi tulu bener arutsütsü aser angati shisaliok agütsüba den angati medical treatment agütsütsü, ta metetdaksü.

Kejriwal-isa, mapa mangur lanurtem nem ita shia unemployment allowance sen 3,000 agütsütsü aser lanurtem nem rongsenketzüng tsütsü tashi agütsütsü, ta metetdaksü.

Paisa, AAP-i state nung anogo shia ghonda 24 khen danga methitemi light agütsütsü aser unit 300 tashi atsükbabo angati asütsü, ta nangzük.

Iba dak alia Kejriwal-isa, party sorkar aliba Delhi aser Punjab na nung ama MP nunga ochimashi samatsütsü aser sorkar inyakyim tsütsü temelenshi tulu adokdaksütsü, sorkar ketdangsertemi kishizüing tashi arua service balala agütsütsü, ta metetdaksü.

AAP sorkari duty inyakba mapang asür sepaitem aser constables kibongtem nem sen crore 1 teyari agütsütsü, ta pai metetdaksü.

Kasa sentong nungji AAP lenir aser Punjab Chief Minister, Bhagwant Mann-ia jembia liasü.

August 23 nikongdang Chandrayaan-3 ita nung anenzüktsü: ISRO

New Delhi, August 20 (Agencies): Amongnü Indian Space Research Organisation (ISRO)-i, August 23 nü nikongdang 6:04 ako meta Chandrayaan-3 ita nung anenzüktsü, ta metetdaksüogo.

Russia nunger Luna-25 bo ita nung junga manenteti tsükokogo, anungji ita south pole tsütsü Chandrayaan-3-i tama anenzüktsü.

ISRO-i Chandrayan-3 anenzükba video ji YouTube aser Facebook densema social media platform aika nung 'live' sayutsü.

Chandrayaan-3 ji August 23 nü ita nung anenzüktsü atema sentong renem, kechiyong iba anogo nungji Lunar Day tasen tenzüktsü. Ita nung experiment agiba mapang talangba asütsü atema Chandrayaan-3 indang Vikram lander aser Pragyaan rover ji anepdang anenzüktsü. Ita nung mission ji alima-anogo 15 asütsü (Lunar anogo 1).

ISRO-i tweet ka ajanga, Chandrayaan-3 ita nung anenzükba maparenji August 23 nü nikongdang 5:45 ako nungi tenzüktsü, kechiyong ita nung spacecraft anenzükba

kanga mezülongi asütsü, ta metetdaksü.

2009 küm Chandrayaan-1 ita South Pole region nung tsükoka liasü aser 2019 küm Chandrayaan-2-a ita nung anenzüktsü merangdang tsükok.

Amongnü ISRO-i, "Chandrayaan-3 ita nung anenzükba ji India nunger science, engineering, technology aser industry atema kanga tongtibang mera ka asütsü, aser space nung bushisüngdangba tsütsü asen linük tejakleni aoba kuli asütsü," ta metetdaksü.



August 20, 2023 nü Patna nung osangbenertem senden ka nung Union Cabinet Minister Nityanand Rai, Bihar BJP Tir Samrat Chaudhary, State Legislative Assembly nung Opposition Lenir Vijay Kumar aser State Legislative Council nung Opposition Lenir Hari Sahni nungeri osangbenertem den jembiba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, LUROI(AUGUST) 21, 2023

Kanga merükmejua alitsüba mapang

Covid wara tamajungtiba mapangbo süiogo aser tang tenük ashiba wara agi atonger. Iba jagi Dimapur aser Chumukedima nungbo tanü nungi hopta tepiyong asoshi kaketreju ajak nem sodi agütsüogo. Item tashidaktem nokdangtsüba mozü tajungtibaji merükmejua alitsüba ya lir. Atangji, merükmeju masüba ajanga tanga tashidak tapu aika adoker saka wara kuma prokshitsüba tashidaktem rongnung Covid aser tenük wara 'Conjunctivitis' na ya tesashiba asütsü. Aji oda, asenoki asenoksasa merüka aliba ajanga nokdangtetsüba tashidak waratem anema raratsüba yabo kanga tasakbo masü ser nung asenok aikati mekokter. Atangji asenok aika atema tang tashi merükmejua alitsüba ya sobaliba tasen ka amai lir, anungji asenok rongnung maneni merükmejua alitsü atema ajungshiteptsüba adoker. Tatsüba agi, asenoki metsü metsütsü atema kilong nung kinük mashi ka bushia oa metsür mesüra mimung nung metsüoka toktsür. Iba amaji ka masü nunga kimalenbo mashi nung metsümeshia toktsütsü aser janonaa mashi nung endoker. Ano, tesempatsü kaji asenok scü kozür aser natzü nar külena sapon amshia teka jungjunga memetsük ser kasa teka agi chiyongtsü achir. Kasaji, amtsük amsang aser chiyongtsü ayokdak, tayokertema metsümeshii oli aser teka memetsük arur kasa teka jagi amtsük agiteta asen nem agütsübaji jungjunga bilemdangra tesempatsüka lir. Aji oda, asen yimti yimdong nung gari tajung nung mener jajartemi dena gari telong nung kechisarina chitenchiraba teküp aser pongdangpongra ajak endoka jajaba angudang jashir aser akseta bilemer. Ajisuaka, aji asaa masü saka merükmejutsü mashi aser mangatetba agi lir. Itemji dang masü saka asen lima tulurtem amendak Secretariat, Directorate aser District office-tem nung metsümeshidak repringdangra, office kar dak alaka, tangodangtsüla masü teshinem aser tezüknem agi sünger kibur maliba ki amai angutsü. Item office-tem nung inyakertemjibo ki tajung nung alir, süoshia tajung sübor aser garia tajung nung mener office-i arur saka pei mapa inyakdak aser pei alidak merüka ayutsübaji tim masüba mapa ka amai bilemer südi. Iba ama jakla jagi asenoki asen town-tem merüka meyutet asenoksasa asenok kangshir. Covid asüyonga, tenük tashidak asüyonga mesüra ramen aser dengue tashidak asüyonga asen lima nungbo yimtaklirtem dang nungibo town nung alirtem dak teimba atonger. Tetezü, yimtak alirtem dang nungibo tulur aser takartemi anir nübortem aliba tesem town-tem nung alirtemang merükmeju masüba alir. Aji oda, town-tem nung alirtemi pei temang aser pei alidak kima yimdong ajak peisasa merüka ayutsü mulungteta inyakra, ibaji Covid, Conjunctivitis, Malaria aser Dengue tashidak waratem nokdangtsü inyakba mapa tuluka asütsü. Covid nungi jenbua alitsü inyakba ama tanüa tenük ashiba wara nungi jenbua alitsü atema teti tzü temerük tajung agi tzü chiguba dang masü saka sapon amshia teka shitokpet shitoka alitsüla aser tejaka meipet meia alitsüla. Iba denji asenoki amshiba towel teti temerük asütsüla aser tangar den melentepa mamshitsüla. Item dakji alaka kodang item tashidak agi tongdir peisasa mozü alia magitsüla saka doctor den asüngdangteper dang anepalu tenzüksüla. Atangji, asenoki asenoksasa asenok ya temeteter amai bilema alitsüba akok, saka nisung ka temeteter akümbaji sen aika akaba agi masü mesüra süoshi tajung agir gari tajung nung jajaba jagia masü mesüra chiyongtsü tajung den dang chiyongba agia masü saka asensasa asen merüka aliba dang masü saka asen alidaka tangar asoshia bilemja tashidak memenatsüba merükmejua aliba jakla yimya jagi sayur. Tanü asenok tashidak wara tapu balala nem menepdaksüba ya asenok sensakba agi masü saka memerükba nungi menaba tashidak teimba lir. Aji oda, aseni asensasa asen temang, teka aser tejak tebang merüka litetba den asenoki asen alidak tesem aser kima yimdong merüka yutetra asenoki alima nung poktetba tashidak wara den raraba tongpang melamelaa tasadang kabo kokogo ta bilemdi.

OLEMSABANG

AOR SENMANG-TSÜMANG LEMSAYIM

~ L.Kika Pongener.

Asen Aor otsüla-oboula nunger mapang nungi tanü tashi liyunga arudang, asen sobaliba dak aketba senmang-tsüman lemsayim aser sentsüh-omang aobayim ya metong metonga dang lateta kar. Aji oda, asen sobaliba otsüren ya zülu nung maka, oda tebang o agi belenzüktepa aruba nungi angazükba tang asünungji, Aor yimtsüng ajunga liromedema masü, ashiko, terarabo tepila-a alitsü akok. Ajisuaka, asen sobaliba bentshia arubaji tongmelang agi ajaki hau ta agizüktettsüba metong metonga ka lir. Kodang kibong ka nung tia makai kijung lua kinungbu sua-dokdir, pai jabaso senmangtsüba sosema tokja lira ken o jembitsü aika makatsü. Kibongji sensaker ka tagitarutsü kecha rizüngokja maka sentsüh tang toktsür suadokra, aser senmangtsüsang jabasoji ano nubo majung sura, kinunger adianu anasatiba senmangertemi külisua sentsüh-ji küpdanga atatsü, aser jabasoji kodang nubo junga kümdir, sentsüh ajungaji pai meyipa aodoktsü. Ajisuaka, sentsühji pai meküpdangra, pa ataba kimong-lumong agi lilemetsütsü. Aji oda, kibongji kaa-ita aliba kibong ka sura kimong-lumong, senti oset, senotsü, tagi-tarutsü ajakji jabaso meyong asütsü. Tia makai senmangtsüba tebur ka danga mesosemi suadokra, adianu anasatibatemi sentsüh-a parnoki aotsü aser tagi-tarutsüa ajak parnok meyong asütsü. Saka tang telidak ki nungji kinungtsüji masü tashi alitsü melatsü, saka la tangar tebur kiyi-i ora, iba kiji senmangertemi meyipa agiadoktsü. Iba dak alaka yimkümdang nungi senmangtepa aruba alu-kimong kwika lir, ajibo par jurila meyong sura tang shiyonga aruba amaji jabaso meyong mesura kinunger adianu anasatiba senmanger meyong asütsü, saka kidong meyong aser kinunger sungsang külem meyong sura pa-a ajunga nungji shilem atatsü ta metong-metonga tang yua kar. Aji oda, tanü tashi Aor sobaliba nung tetsür senmang maka ta asüba nung lia arudagi.

Ajisuaka, iba senmang lamsayim nung ya bendanga angateta amshitsüba kar lir ta bilemer. Tanü putu nung nisung aika sorkar mapa inyaka itasen chia, aser itasen chia sorkar mapasa meinyak-aka aayang-tsüyanga pei yimtsüng toktsür Jila nung oa alitsüba akümer, aser Jila nungji ki-o-jen yanglua, kimong-lumong alia teret endoka alitsüba tensa mapang kati bentsür aruogo. Aji oda, Jila nung alir kibong kar nung kinungpu suadoker, senmang-tsüman lemsatsüba denjira, asenok ajaki angatettsübaji, yimdak-yimtsüng nung akaba kimong-lumong koba yimkümdang nungi senmangtepa aruba senmang lir aji balaka, ibanungjibo tetsür kecha shilem maka, saka Jila nung apuani külemi meranga inyaka bendenba rongsen agi yangluba ki-o-jen aser alidenba kimong-lumong, iba nungjibo kinungtsü aser jala-a shilem lir ta angateter. Aji oda, iba tangatetba nungji meinyakra ajibo tim masü aser tenuk tapok sobaliba mapa ka asütsüba ta angateter. Küm ishika sua ogo, asen Aor kibong ka nung kinungbu suadoker senmang alem dang, tia maka par-ji senmang amangtsüba jabaso ka danga sosema maliasü. Aser kinungpu jagi kinungtsü tena kibong kümer külemi meranga inyaka bendenba agi yangluba ki aser alidena ayuba kimong-lumong ajakji par jalatem nem agutsütsüba lemsar 'Affidavit' nung tenungteta tejangja zülua tokja liasü, anungji iba tezüluba kaketji ngur kinunger senmangertem, yabo sobaliba dak maketba mapa-a ta mepelai asatempa bangsentepba otsü angashia/ngua denjia aruogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kenya nung yimsü alia amangba Arogo pongu nokdangogo



Good News International Ministries nung pastor, Paul Mackenzie (abelen) aser New Life Prayer Centre & Church pastor Ezekiel Odera na noksa nung angur.

August 20, 2023: Kenya linük nung Yisu Khrista ajurutsü atema lumiseta asütsü ajungshiba dak sendakba Arogo pongu sorkari nokdangogo, ta Hokolbarnü (August 18) sorkari document ka ajanga metetdaksü.

Arogo ka nungbo lenir kati lumiseta asütsü ajungshiba sülen iba Arogo nungji züngsem 400 dak tema lumiseta süogo.

Pei sasa pastor ta sangdonger, pastor Paul Nthenge Mackenzie indang Good News International Ministries taküm May 19 nü nokdanga liasü, ta Registrar of Societies-i sangdong ka ajanga metetdaksü.

Pastor Mackenzie-i pa sülen anidakertem dang Yisu ajurutsü atema lumiseta asütsü ajungshia liasü; nisung teimbaka lumiseta asü saka karbo tekong nung alenseta südaksü aser karbo zükseta liasü, ta post mortem report ajanga jangjaogo.

Sorkar ketsangsertemisa televangelist, Ezekiel Odera indang New Life Prayer Centre & Church-a nokdangogo. Ezekiel aser pastor Mackenzie na tsünga tesendaktep liasü.

Taküm April ita nung Malinda anasa arem ka nung tasü mang aika anguba sülen Ezekiel Odera-a apu, ajisüaka May ita nung pa bail nung chiok.

Mavueni jila nung Pastor Odera indang New Life Prayer Centre aser Arogo Tenla kidang nisung aika aliba ketsangsertemi kümzüka liasü.

Mavueni jila ya Shakahola arem nungi kilometer 66 shi pilar lir.

Mackenzie anema maneni bushisingdangtsü atema ano anogo 47 pua ayutsü mapang atsülangogo, ta ketsangsertemi metetdaksü.

Malinda anasa Shakahola arem nung tasü mang aika ngutetba sülen sorkari yimsü alia oa amangertem azüoktsü atema

kanga nendaka inyakdar.

Kenya nung nüsung teimbaka Khristantem lir aser iba linük nung register süa aliba Arogo 4,000 dak tema lir.

Nisung aika lumiseta südaksüba tatalokba dak sendakba nungsa taküm June ita nung Joseph Buyuka-a pua liasü, ajisüaka police ket nung alidang pabo lumiseta asü.

Pastor Paul Mackenzie-i pa sülen anidakertem aser parnok chirnurtem dang, alima tatembang matongdang nenok tama kodaki oa Yisu ajurutsü atema nenoki lumia süadoktsüla, ta tuyuba atema pa anema ken o benoka lir.

Kenya nung Kilifi County kübok Shakahola arem nung ketsangsertemi tasü mang aika ali nung tutetogo. Tang tashi nung tasü mang 400 dak tema ngutetogo aser ano nisung 600 dak tema mangur, ta tamalen regional official Rhoda Onyancha-i metetdakja liasü.

ANOGO ABEN TSÜNGREM DEN

Sarasademdak Aser Tenü ng Asangdak

T. Ken 122: 1 -9

Tsü ngrem kidangi Pa külemi aotsü nai pelar asü? Ken züluri ashir, "Kibuba kidangi asenoki odi, ta ashidang ni pelaa liasü" (t.1). Kijai Kibuba külemdaki aotsü akok. Asenoki anogo shia Kibuba O zünga Pa külemtsü akok. Saka Khristantem kati ka den sendaktepa lir. Asenok Tsü ngremer san telok lir. Asenok Pa kidang Par chirtem lir. Anungji Pa kidang Par tanurtemi Pa külemi külemtsü baji jangratsüla.

Tsü ngrem kiji Pa tenü ng asangdak lir. Tekong 4 nung Israel kini Tsü ngrem tenü ng asangtsü asoshi Tsü ngrem kidangi aoba indang ashir. Asenokia Tsü ngrem tenü ng asangtsü asoshi Pa kidangi aotsüla, aser asenoki Pa tenü ng koda asangtsüla! Chales Spugeoni ashir, "Khristantemi parnok temulung masüba marbel nung zülur aser parnok temoatsütem lisem nung zülur." Tsü ngremi asenok nem moatsüba aser asenok asoshi inyakba asenoki yakta amadoker. Na kodang Tsü ngrem kidangi odir Pai na asoshi inyakba ajak asoshi Pa tenü ng sangang.

Tsü ngrem kiji sarasademdak ki lir. Tekong 6 nung ken züluri Yirusalem asoshi sarasademtsü ashir. Tsü ngremer nübur aser Yirusalem yimjung asoshi nai sarasademtsüla. Arogo asoshi, lokti asoshi, aser shirnok temaba menden nung lir parnok asoshi nai sarasademtsütsüla. Linük nung azükaru asoshi sarasademtsüla, tanelaren rongsen aser temoatsü asoshi sarasademtsüla. "Na meimertem azükarudakjang" (t.6). Ken züluri Tsü ngremer nübur asoshi sarasademtsü. "Kü adianutem aser kü tembartem asoshi, ni tang ashitsü, ne dak yimjung liang" (t.8). Asenoki Tsü ngremer nübur asoshi aser parnok tajung asoshi sarasademtsüla. "Kibuba asen Tsü ngremer ki atema ni tajungtiba bushitsüla."

Tsü ngremer nüburtemi külemi senteper tenü ng asangtsü aser Pa dang sarasadem baji Tsü ngremi mulungba lir. Kodang nai aji inyakdir, na ajanga Tsü ngremi tangar nem Pa tesü nep agütsütsü.

Israel-i Evangelical sayutsü ngirtem nem visa magütsür: David Parsons



David Parsons

August 20, 2023: Israel sorkari Evangelical Khristan sayutsü ngirtem nem joko visa magütsür, ta osang ka ajanga metetdaksü.

Joko Israel nung aliba Evangelical Christian organisations-i parnok staff tem atema visa mangutsü, aser ibaji ajanga mission mapa nung tetsükdaksü ajurutsü.

Osangbener den jembidang International Christian Embassy Jerusalem (ICEJ) tatong Tir aser otongdar, David Parsons-i, "Interior Ministry-i tanem-tanemi onok anema inyaker. Item ama temzüng tesashi balala kübok joko onoki Israel nung Khristantem atema inyakba tongtibang mapatem meinyaktetsü," ta metetdaksü.

ICEJ leniba nung linük aika nung, talisa Oceania area nung Evangelical Khristan nüsung aika kümdaksütsü atema inyaker, iba denji külemi Yirusalem nung Embassies amenoktsü atema inyaker. Tang Israel kübok Palestinian Khristantem kanga timtemdar.

Evangelical Khristan telok balalai mission mapa balala inyakyonga Israel nung aikati parnok dak melung malemer aser mission mapa inyakba ya Yihuda nung Khristan yimsü dangi meyipdaksütsü nükjidong nung inyaker ama bilemer.

Israel nung evangelical organisation karibo akhidang Germany nung Hitler kübok Nazi party nungi jenbur Yihuda nungertem yarir. Karibo iba ya akhidang Europe nung Khristantemi aibelenba mapatem metongshitsü atema inyaker amai bülemer.

Ano Evangelical telok karibo alima tesem balala nung Yihuda nungertem Israel-i arutsü atema ajungshia inyaker. World War II mapang

nung Yihuda nungertem million 6 tepseta liasü, aser iba nungjagi kümzüker Yihuda nungertem Khristan telok balalai yarir.

Laishiba nung tatembang anogo anasa Israel nungertem pei lima (Israel) nung adenshitsü indang shia lir. Küm 2,500 tejaklen Israel nungertem alima tesem ajaklen prokshia liasü ajisüaka tatembang anogo anasa Israel chirtem ajak Israel nung adenshitsü (Ezekiel 37.21), Yihuda nungertem ajak Israel linüki meyipa arutsü (Tazü ngkunem 30:3), iba dak alia Israel dak sendakba tatembang anogo temaitsü aika Laishiba nung shia lir.

Osangbener den jembidang ICEJ-i, Yihuda nungertem 180,000 Israel-i meyipa aruba nung parnoki yaritepa lir, iba denji külemi parnoki yarise ma 'Feast of the Tabernacles' ayongzüker, ta metetdaksü.

ICEJ-i, coronavirus wara mapang nung mapa inyaksü atema parnok nem visa tasen magütsü, aser 2022 küm December ita nungi Israel nungertem sarasademtsü kübok

Evangelical Khristan sayutsü ngirtem nem visa magütsür, ta metetdaksü.

Tawa Israeli interior ministry-i ICEJ dang, nenok ya yimsü dak sendakba institution ka ama mezü ngshir, ibayongji sayutsü ngirtem atema visa magizüker, ta metetdakja liasü.

Parson-i, "Onok ya Khristan organisation ka lir aser 'Christian association' ta register süa lir; iba mapang nungjagi tenzüka onoki tesüiba küm aika Ministry of Interior nungi sayutsü ngirtem aser lenirtem atema visa ngua aruogo," ta metetdaksü.

Mongintemi ashiba agi, tang Israel sorkar tasenba nung far right aser right parties aika lir aser parnoki Khristan telok kar dak melung melemteter.

2020 küm Israel ketsangsertemi Khristian TV station ka anenja liasü aser tang United Torah Judaism party-i tamangba yimsü melenba ya ozü ng alema inyakba mapa ka asütsü atema ozü ng ka benoktsü atema lenmang bushir.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Rüdang

(V) süng agi tepdanga shibangba (blockade by wooden materials)

* Yimteni alu lenmang süng agi **rüdanga** toktsü.

Rüdang

(v) kenyongi lepdangba (cut at once)

* Tiabai alu nung süng ajak **rüdanga** lepa ao.

OLONG PAITEP # 6612

1			2		3		4		5
6		7							
					8				
9				10					
							11		
			12						13
	14								15
							16		
			17						
									18
19									

TIPIEN

- 2. Teburtemi tejak nung awaba
- 6. T _ _ _ em
- 8. Tzük ayudak
- 9. Nüngdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüngda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6611 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA



Women's World Cup 2023 semi-final ajanga Australia nung otsü tassen ka yangluogo. Bodbarnü iba asaya nung England-i Australia tsürtem madak goal 3-1 ajanga takok angu. Iba asaya ya Australia nung most watched television show liasü aser nütsüng yongsük million 25 shi ka aliba linük nungi nisung million 11.5 shi kati iba asaya reprangba ajanga otsü tassen ka yanglutet.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Bengaluru nung Sikkim nunger ka dang 'Chinese' jaa azük



Gangtok, August 20, 2023

(Agencies): Electronics City Bengaluru nung arishi küm 30 tain tebur ka dak nisung aseme kanga mejungi azük.

Iba nisung ya K Dinesh Subba ta jangjaogo aser pa ya West Sikkim nungi lir.

Subba ya Neeladri Nagar nung aliba hotel ka nung waiter inyaker aser pa tekolak aser tejak yiruba anepalur mozü kidangi nungi anizükogo.

Bodbarnep 3:00 ako meta nisung Subba ya party ka nung dennür meyipa aodang nisung

asem bike ka nung mener arur pa dak azük ta pai Electronics City police tsüngdang FIR benokba nung shia lir.

Iba lendong atalokba anasa security guards-i police nem osang sangoktsü.

"Keyi tebuta dak hadir ka amshia azük. August 14 nü pa wedding anniversary liasü aser iba jagi August 15 aonung pai pa tenu aser medemertem asoshi party ka katsü. Iba sentong tembangba sülen par kidangi aodang amak. Pa amaktertem Chinese ta jaa azük" ta Deepak Dorji-i ashi.

Subba ya yaküm December ita Bengaluru-i ao aser pa kinungtsü o jabaso kinü den külemi alir.

Manipur assembly session mayongba atema Congress mepelar

Imphal, August 20, 2023

(Agencies): Manipur Pradesh Congress Committee (MPCC)-i Manipur Legislative Assembly emergency session ka alitsü mepishiaka magizüker ta Okram Ibobi Singh-i ashi.

Sorkari assembly session mejazüker aser iba atema onok mepelar. Assembly session ka alitsübaji temzüngi melar ta Congress Legislature Party leader Ibobi Singh-i ashi.

August 20 nü Congress Bhawan nung Sadbhavana Diwas amongdang pai iba osang metetdaksü. Taoba Prime Minister Rajiv Gandhi-i arishi küm 79 buba ajungba bilemteta iba anogo mongogo.

"Manipur nung tensa mesüngjemteti aliba onük jembitsü atema Congress-i mapang talangka Manipur Legislative Assembly special



Okram Ibobi Singh

session ka alitsü mepishia arur. Onoki aiben temepishiba agüjaka aser Manipur Governor Anusuiya Uikey den sendentem menaka state sorkari iba session mejazüker" ta pai ashi.

"Cabinet-ibo August 21 nü special session alitsü lemtetaka state sorkari session mayonger aser iba ya kodanga

meinyakdangba mapa ka lir. Sorkari session ayongzüka agitsüla aser parnoki kechi inyakdir onoki repranga atatsü" ta Ibobi Singh-isa metetdaksü.

"Rajiv Gandhi asüba sülen Bharat Ratna agütsüba aser Centre aser state sorkartemi Sadbhavana Diwas amongba ajanga pai mapa tajung inyakbatem agizüker" ta pai ashi.

"Rajiv Gandhi anojungi asüba ya India atema dang masü saka alima atema takoksa ulura liasü. Rajiv Gandhi taküm ali asübo India nung science aser technology wadang kanga tajungba kümer lila" ta Ibobi-isa ashi.

Iba sentong nung Manipur Pradesh Congress Committee president Keisham Meghachandra Singh-i Sadbhavana Diwas amongba indang nükjidong metetdaksü.

Churachandpur district nung lisopur ka khaset

Imphal, August 20, 2023

(Agencies): Manipur kübok Churachandpur district nung prangpong amertemi arishi küm 53 tain lisopur ka khaset.

Iba lendong ya Churachandpur nung Khuga Tampak anasa atalok.

Iba nisung ya Lalkhanthang

ta jangjaogo aser tanep 7:00 ako meta pa indang tasü mang angu.

Lalkhanthang ya mejangjatetba nisung kari khaset. Pa temang nung injang zübo aika keta liasü ta police-i ashi.

Iba mapang pai two-

wheeler ka ania liasü aser ibaji lendong atalokdak angu.

Pa indang mang post-mortem atema Churachandpur district hospital-i bener ao aser police-i bushisüngdang ka tenzükogo. Tang tashi nung telok shingaia pa tepsetba tenüng agiba osang kecha mali.



Congress Bhawan Manipur nung August 20 nü Sadbhavana Diwas amongdang Congress Legislature Party leader Okram Ibobi Singh-i taoba Prime Minister asür Rajiv Gandhi nem tetushi agütsüba angur.

Pakistan north tsütsü North Waziristan nung nisung 11 pokset



Islamabad, Luroi/August 20 (Agencies): Pakistan northwestern tsütsü tribal nisungtem aliba region ka nung improvised explosive device (IED) ka gari telung nung apokdang mapa inyaker nisung 11 asü, ta sorkar ketdangstür temi ashir.

Linük yimtiba, Islamabad nungi mile 190 shi pilar North Waziristan kübok Shawal Valley nung iba lendong agütsüba ya Pakistan indang caretaker Prime Minister Anwaar-ul-Haq Kakar-i social media sapang, X (taoba mapang Twitter ta ajaba) nung lemsatap.

Khyber Pakhtunkhwa province nung aliba security aser police ketdangstür temi ashiba agi, IED südi ta temolung melemi aliba tapoktsü oset yagi Afghan arütsü anasa Waziristan district nung project ka inkaba nung aayanger tem mena aliba truck ka poksa.

"Parnok ya army post ka tang teyangludak alidak mapa inyaka liasü... aayangertem mena aliba gari telung nung IED ka apok," ta North

Waziristan indang deputy commissioner, Rehan Khattak-i osangbener dang ashi.

Iba lendong asoshi telok katia tenüng agia mali.

Taoba küm Pakistan Taliban, koba dang TTP ta ajar aser sorkar tsüngta ceasefire tembangba sülen Pakistan nung telungpur telok balalai lendong agütsüba tali ajurur.

Taoba küm tamangba yimsü telok kati Khyber Pakhtunkhwa kübok Bajaur district nung political rally ka nung bomb tesashi pokdaksüba asoshi ISIL (ISIS) temi tenüng agia lir, kong nisung 63 asü. Iba lendong agütsüba nung ISIL den sendaktepa aliba Islamic State in Khorasan Province (ISKP mesüra ISIS-K) dena lir ta ashir.

Afghanistan den arütsüa alidak tribal region nung lendong tesashi atalokba asoshi Islamabad-i Kabul tenüng asener. Taliban ketdangstür arütsü alema telungpur telok balala senzüba nokdangtsü asoshi mera peria magir, ta Pakistan ketdangstür temi aitsür.

Ajisüaka Pakistan-i tai tongloktsüba Taliban ketdangstür magizüker.

"Tawa Pakistan nung lendong atalokba sülen ketdangstür temi par linük indang security tashi itshitsü melen ano Afghan nung tenüng asener," ta Taliban administration indang odongtar tongtiba, Zabihullah Mujahid-i ita tetenzüklen sangdong ka nung shia liasü.

Taküm kisüng nunga Khyber Pakhtunkhwa province nung lendong 300 dak tema agüja lir, ta official data ajanga sayur, aser itemji timba TTP-i tenüng agir.

TTP ya 2007 nung tentet aser tamendakba aser tangatetba tsütsü Afghan Taliban den mesükteper, saka inyakyim balala.

Takhangba aika rongnung Pakistan Taliban temi Islamic laws tesashiba amshiner, sorkar ket nung aliba par züngsemtem chioktsü akhanger aser Afghan arütsülen tribal region nung Pakistan mitkar ajemtsü akhanger.

OFFICE OF THE LONGPOK SEMCHIR TELUNGJEM

HQ: MOKOKCHUNG
AOLILONGPOK SEMCHIR TATAR SALANG
Ref. No. Nil Dated: 16 August, 2023

SANGDONGER

Wb. Lolenmayang, Molungkimong Pai züluba "AOLI LONGCHAR LIYONGA JAJABA LIPOK" Kaket nung Longpok Semchir Tebouren tenüng Pezü aibelena Longchar Tebou küma amshia lir, Tebou tenüngtemji itemi; (i) Mongsdong (ii) Resemdong (iii) Longchenti (iv) Longmetang. Iba ken-o-angatteteptsü aser Pa temeten ashitsü asoshi Longpok Semchir Telungjem ajanga Pa aiben jaok saka tashi mangai maru. Lipok Putipuin asünungji 9th Sept. 2022 anogo nung Longpok Semchir Tatar Salang ajanga bendanga agizük aser iba ken o jembitsü asoshi Aor sobaliba dak aketba awashi, yimli tabensa sayua Pa ano maneni jaok saka ajak nungji maru. Anungji iba ken-o- tanü 16th Aug. 2023 anogo Longpok Semchir Tatar Salang ajanga Soyim, Langpang Lenden, (Ungma) nung atenshia pa dang Aor Putipuin raksatsüba, tangar kin indang Tebou tenüng rakzüksü merangba aser Tatar Salang mezüngmeshiba atema Pa Aitsür. Anungji Wb. Lolenmayang, Molungkimong dang Nashi Tenet(7) Puti Senchi achir. Iba osang agütsüba anogo nungi tenzüka Anogo Tenet(7) nü tsüngta Nashi Tenetji(7) Soyim, Langpang Lenden, (Ungma) tongjang ta metetdaksür.

Longpok Semchir Tatar Salang tenüng nungi:-

1. Chubatozüng, Tatar, Chuchuyimlang
2. Rongsenchiba, Tatar, Longphayimsen
3. Meraliba, Tatar, Nokpu
4. Aonüngsang, Tatar, Mopungchuket
5. Lanungangshi, Tatar, Molungyimsen

Anogo : 16th August, 2023

Sd/-
(Wb. Lipokzülü LKR, Tatar, Ungma) Mendenbuba, Longpok Semchir Tatar Salang

Sd/-
(Wb. Tiajungba Lkr, Tatar, Ungma) Tezülar, Longpok Semchir Tatar Salang

OFFICE OF THE SALULAMANG VILLAGE COUNCIL REONGSANGER PUTU

P.O.Chuchuyimlang, B.P.O. Salulamang
Dist : Mokokchung, Nagaland.

KONANG NÜNGSANG AGÜTSÜR

Kongru Temsükümla Ao, tsürabur asür Limayatet aser lmtirenlala na jala, Assistant Professor, Department of Sociology & Acting Assitant Dean, School of Social Sciences, Nagaland University nungi Doctorate jenjang tongteta takok aser konang bentsür aru nung la nem yimkongi tenüngsang tulu agütsür aser Tsüngrem tenüng asanger. Ano, Tsüngremi la wadang nung tali moajangma.

Sd/-
S. MEREN JAMIR
Chairman,
Salulamang Village Council
Mokokchung, Nagaland.

Sd/-
I. LANU
Secretary,
Salulamang Village Council
Mokokchung, Nagaland.

Niger coup lenirtemi yimsüsüba melenteptsü asoshi küm asem benokdang

Niamey, Luroi/August 20 (Agencies): West Africa lenirtem den senden amenba sülen Niger coup lenirtemi civilian sorkar nem tashi belenzüktsüsü atema küm asem inyaksangshitsü benokogo aser linük makra kanga ayongrabo masütsü ta tekümdangtsü metetdaksüo.

General Abdourahmane Tchiani-i Honibar aonung menor national television den jembiba mapang, sorkar tashi melenteptsüba dak sendakba nung osang tejangja magütsü aser ashiba agi anogo 30 tsüngda iba jenjang agitsü atema military council-i sensaksem ayongzüka agiba mapang telemtetba agitsü, ta ashi.

"Linük kümzüka ayutsü atema National Council mesüra Niger nung aliba nüburtemi rara maginer aser sensaksem atema mulunga lir," ta Community of West African States (ECOWAS) nungi lenirtem den Nigeria yimtiba Niamey nung mezüngbuba senden amenba mapang pai ashi.

"Ajisüaka ya jangja yudi:

onok amaktsü atema jenjang kar danga agira nisung kari bilemba ama kanga melarabo masütsü," ta pai ashi.

July 26 nü military-i sorkar atsüngba sülen ECOWAS-i Niger nem tenokdangba balala agütsüo aser linük nung aki ama temzüng ozüng benokshitsü atema "standby force" ka yoktsü atema tetuyuba agüja liasü. Bloc-i Hokolbarnü ashiba agi, military-i jenjang agitsü atema anogo ka lemtetogo aser ECOWAS linük 15 nungi 11-i iba inyakyim atema sepaitem yoktsü atema mulunga agizükogo.

Tchiani-i o jembiba mapang bendanger sepaitem den longjemer sepaitem telok ka tenteta Niger amaktsü atema ECOWAS renemdar, ta ashiba den regional bloc-i tenokdangba balala agütsüba ya ozüng alema aser meimchir dak mebenshitsuiba inyakyim ka lir, ta ashi.

"Onok nukjidongji tashi atema masü ta ni nenshia metetdaksür. Onok sensaksem atema renema aliba nenshia metetdaksür," ta pai shisem.

Niger nung military-i sorkar

atsüngba anema ECOWAS-i jenjang tesashi agiogo, koba iba tesem nung küm tenet tsüngda military-i sorkar atsüngba tenetbuba liasü.

Bloc-i military amshia jenjang agitsü amokmerenaka parnoki civilian sorkar nem maneni linük yimsüsüdaksütsü atema sensaksemtsü asoshi inyaktepa arudar. Niger ya parnok meketa aliba linüktem aser bendanger linüktem atema kanga tongtibang lir kechiyong iba linük nung uranium aser totzü aika lir aser al-Qaeda aser ISIL (ISIS) den sendaktepa aliba teloktem den raratsü asoshi bendanger sepaitem amenoka aliba tongtibang tesem ka lir.

Honibarnü taoba Nigeria head of state General Abdulsalami Abubakar lenisüba nung aruba lenirtem ya military-i shimba Ato Kilonser-i agizüka liasü, ta Reuters sangdong ka ajanga metetdaksü.

Tchiani den ajurutepeba sülen bloc yagi military-i atsüngtokba tir Mohamed Bazoum dena ajurutepe, shiba military-i sorkar atsüngba sülen kidang nungi

mainshidaksüi sota yua lir.

"Onoki Bazoum den ajurutepego aser pai pa dak inyakbatem indang metetdaksüo. Pai pa tebilemtsü balala ajangshiba indang onok nem metetdaksü. Onoki idaki yokba lenirtem den onoki jembitsü. Iba senden ajanga mepetmesü bentettsü atema lenngam lapoktsüo," ta Abubakar-i ashi.

Niger dangi United States ambassador tasenba Kathleen FitzGibbon sülen ECOWAS lenirtem Niamey-i oa liasü.

US State Department otongdar kati ashiba agi, ambassador tasenba yagi sensaksem ajanga ken o benteta temzüng ozüng wazüka ayutsü atema rangloker inyaktsü aser iba den Bazoum aser par kibong aser temzüng ozüng alema shirnoksa sota yua lir parnok ajak tangsa tang chiokdaksütsü atema inyaktsü.

Kasa mapang nung United Nations-i ken o bentettsü atema jenjang agia West Africa and Sahel atema parnok indang representative Leonardo Santos

Simao, Niamey-i yokogo.

Honbarnü Niamey yimtung nung nüburtem aikati ashiba agi, ECOWAS-i military yoka parnok makra item sepaitem den raratsü atema parnok renemdar.

Nüburtem meyirejang aika stadium tongtiba kima rarartem ama aser tanga nungdak nung yariteptsü asoshi parnok tenüng züngoksemtsü asoshi adenshia liasü. Nüburtem kari ashiba agi, parnok anepdang 3 ako nungi atar. Kasa mapang nung lanurtem telok balalai military yimsüsürtem pusema yimyim ayim aser iba den ECOWAS aser taoba mapang parnok yimsüsür France anema yimyim ayima liasü.

Sentong ayonger Amsarou Bako-i ashiba agi, coup kümzüka ayutsü atema volunteer tem anisemba inyakyim nung military densema mali. Iba sentong tenzüka sülen ghonda ishika lir sentong ayongertemi ashiba ashiba agi, iba sentong ya thinentüsü saka ken o rasa mashi.

Nüburtemi coup lenirtem pusemaka ken o asadangertermi ashiba agi, military-i linük ajungabo aziüka mali.

Spain-i FIFA Tetsür World Cup kokogo



Tetsür World Cup akokba sülen Spain team takok marok bener tangokba noksa nung angur. Final nung parnoki goal 1-0 agi koka liasü

Luroi/August 20, 2023

(Agencies): Spain tetsür team-i otsü tasen ka yanglua Deobarnü, Sydney nung FIFA Women's World Cup final nung goal 1-0 agi England madak takok nguogo.

Spain captain Olga Carmona-i asaya mezüngbuba shilem nung goal ka indakja lar team-i asaya akokba nung teryari tulu agüja liasü.

Asaya nung Spain team-i ball magütsüi asayatsü merang aser parnoki ball aziüoka asaya. Ajisüaka England team-i tesülen nung asayatsü merang aser minute 15buba nung goal idaktsütsü maongka angu ajisüaka Lauren Hemp-i metsüba ball crossbar nung ondaker adok.

Kasa mapang nung Spain team-ia goal idaktsütsü asoshi maongka angu ajisüaka Alba Redonda-i metsüba ball

England tsür Mary Earps-i kanga junga nokdanga liasü.

Team ana tsüngda kanga toktepa asaya arur minute 28buba nung Mariona Caldentey-i agütsüba ball ka box telung nung captain Carmona-i agizüka kanga junga idakja liasü aser iba goal ka yagi telok ana tsüngda takoker bendanga liasü.

England coach Sarina Wiegman-i asaya tanabuba shilem nung asayar kar melen aser Alessio Russo melena lauren James yok aser Daly melena Choe Kelly yoka liasü.

Kelly-i la melenli la aiba metetdakja tachichilen nungi cross tajung ka Hemp nem agütsü, ajisüaka Hemp-i metsüba ball tezülени oatok.

Iba sülen Spain coach Jorge Vilda-i final asaya atema mezüngbuba asayar melena Oihane Hernandez melen Alba

Redonda yoka liasü.

Asaya nung minute 63buba nung Keira Walsh-i box telung nung handball ka menaba sülen VAR asadang aser Spain nem penalty metsütsü asoshi maongka agütsü, ajisüaka Jennifer Hermoso-i metsüba penalty England goal keeper Earps-i kanga junga nokdanga liasü.

Maneni Lauren James-i goal nung ball kanga junga metsüoktsü saka Spain goal keeper Cata Coll-i bar adena ball kanga junga nongtoka liasü.

England team aser fan tem atema anisüngzük agüja asaya mapang tembangba sülen fourth official-i minute 13 apulokja liasü.

Ajisüaka Spain team-i asaya madem tashi kanga junga nokdanga linük puti otsü nung tang mezüngbuba iba asayamung kokogo.

Prannoy aser Sen nati anir World Championships asayatsü

New Delhi, Luroi/August

(Agencies): Hombarnü nungi tenzüka asayatsü aliba BWF World Championships nung HS Prannoy aser Lakshya Sen na asayaba angutsü. Tenaprongla tang kanga junga asayaba mapang lir aser iba asayamung nung tenati tongtibang shilem agitsü.

Kasa asayamung nung India nunger tebur tarep asayar Satwikasairaj Rankireddy aser Chirag Shetty nati takok tajung nguteta asayatsü imlar. Tenati taoba küm iba asayamung nung bronze medal ngua liasü.

Iba asayamung ya 1977 küm tenzük aser India nunger asayartem tang tashi nung iba asayamung nung medal 13 nguteta lir, kong gold ka, silver 4 aser bronze ti densema lir.

Iba asayamung nung India nunger asayartem rongnungi Prakash Padukone-i 1983 küm mezüngbuba bronze medal ka ngua liasü. Iba sülen India nunger asayartem rongnung PV Sindhu amala asayari anir 2011 küm nungi medal kabosa ngua arudar.

Sindhu shibai iba asayamung 2019 küm kokogo, lai tang tashi nung iba asayamung nung medal pongu ngua lir, saka Basel nung tesüsa medal ka anguba sülen tang tashi nung medal ka danga monguteti arudar.

Kidambi Srikanth aser Lakshya Sen nati 2021 küm silver aser bronze medal nguogo aser Satwik aser Chirag nati 2022 küm bronze medal ngua liasü.

Iba asayamung nung Prannoy-ia junga asaya arudar aser pai 2021 aser 2022 küm quarterfinal tonga asayaogo.

Malaysia Masters aser Australian Open final tonga asayaba sülen Prannoykanga junga asaya arudar aser taküm iba asayamung nung junga asayatsü imlar. Pa iba asayamung nung mezüngbuba Finland nunger asayar Kalle Koljonen den asayatsü.

Maneni Sen Mauritius nunger asayar Georges Julien Paul den asayatsü aser taruba round nung Korea nunger asayar Jeon Hyeok Jinden asayatsü imlar. Srikanth iba

asayamung nung mezüngbuba Japan nunger world number 15 asayar Kenta Nishimoto den asayatsü.

Indonesia nunger world number 2 asayar Anthony Ginting asayamung nung shilem magitsü atema telemtetba agiba sülen Srikanth atema lenmang lapoktsüogo aser pai junga dang asayatetra quarterfinal ayong ayonga atongtsü ana nung lir.

Tetsür kija asaya nung Sindhu mezüngbuba rond atema bye nguogo aser la tanabuba round nung Japan tsür Okuhara mesüra Vietnam tsür Thuy Linh Nguyen den asayatsü.

Tebur tarep asaya nung Satwik aser Chirag na nema mezüngbuba round atema bye agütsüogo aser tetsür tarep asayar Treesa Jolly aser Gayatri Gopichand na nema bye agütsüogo.

Tang agi pongubenbuba Copenhagen nung iba asayamung ayongzüka asayatsü. Denmark yimtiba nung iba asayamung ya 1983, 1991, 1999 aser 2014 küm ayongzüka asayaogo.

National coaching camp atema

Hockey India-i asayar 39 shimogo

New Delhi, Luroi/August 20

(Agencies): Hangzhou Asian Games atema renemshiba mapang Hockey India-i tebur national camp atema asayar 39 shimogo. Iba camp ya Bengaluru nung Hombarnü nungi tenzüktsü.

Iba coaching camp ya asayartem parnok sempet arangtetshidaktsütsü nükjidong nung ayongzüko, koba SAI Centre nung August 21 nungi September 18 tashi agitsü.

Taruba Asian Games ya September 23 nungi October 8 tashi China nung asayatsü.

Iba ita tetenzüklen Chennai nung Asian Championship Trophy pezübenbuba akokba sülen India tebur team Asian Games nung asayatsü atema renemba mapang ka lir. Parnok September 24 nü mezüngbuba Uzbekistan den asayatsü.

Iba asayamung nung India team Pool A nung Pakistan, Bangladesh, Singapore aser Uzbekistan den ata lir.

"Ita ishika tsungda onoki team ka ama renloka aoba aser maneni angazükba sayuogo," ta India chief coach Craig Fulton-i ashi.

"Iba camp ya onok atema kanga tongtibang lir, kechiyong onok Hangzhou Asian Games atema renemshidar, koba Paris

Olympics 2024 nung jenjang ka ngutettsü atema lenmang ka asütsü," ta paisa ashi.

Kasa mapang nung India captain Harmanpreet Singh-i ashiba agi, "iba camp ya lenla kar nung asaya yimya melenshitsü aser team ka ama külemi asayatsü atema angazüktsü asoshi maongka tajung ka asütsü."

Asayartem yamai alitsü:

Goalkeepers: Krishan Bahadur Pathak, PR Sreejesh, Suraj Karkera, Pawan, Prashant Kumar Chauhan

Defenders: Jarmanpreet Singh, Surrender Kumar, Harmanpreet Singh, Varun Kumar, Amit Rohidas, Gurinder Singh, Jugraj Singh, Mandeep Mor, Nilam Sanjeep Xess, Sanjay, Yashdeep Siwach, Dipsan Tirkey, Manjeet.

Midfielders: Manpreet Singh, Hardik Singh, Vivek Sagar Prasad, Moirangthem Rabichandra Singh, Shamsheer Singh, Nilakanta Sharma, Rajkumar Pal, Sumit, Akashdeep Singh, Gurjant Singh, Mohd. Raheel Mouseen, Maninder Singh.

Forwards: S. Karthi, Mandeep Singh, Lalit Kumar Upadhyay, Abhishek, Dilpreet Singh, Sukhjeet Singh, Simranjeet Singh, Shilanand Lakra, Pawan Rajbhar.

Bournemouth-i Leeds United nungi Tyler Adams alizükogo

Luroi/August 20, 2023

(Agencies): Bournemouth-i Leeds United nungi midfielder Tyler Adams alizükogo. Pa ya pound million 20 shi agi alizükeralitsü amanger.

Arishi küm 24 tain asayar shibai küm pongu atema tenanzüktepa yangluogo, pa taoba küm RB Leipzig nungi küm pongu atema Leeds nung dena liasü.

Ajisüaka Elland Road Club ya taoba season Premier League nungi relegate asüba sülen tang iba jenjang agiogo.

"Pa AFC Bournemouth nungi alizükba ajanga club ka ama onok nükjidong tulu aliba sayur," ta Cherries chief executive Neill Blake-i ashi.

"Tyler alizükteba atema onok kanga pelar kechiyong pa ya onoki mapang talang ka nungi nükshia aliba asayar ka lir," ta paisa ashi.

Bournemouth-i asayar indang contract nung release clause pound million 20 toktsüogo, ajisüaka Adams ya pound million 20 dak tema agi

alizükeralitsü aser release clause kecha malitsü ta bilemba BBC-i metetdaktsü.

United States nunger international asayar ya 2022-23 season nung Leeds nungi 26 ben asayaogo.

Ajisüaka pa March ita tatemlen hamstring surgery agiba sülenbo masayatetsüsa aküm.

Adams ya taküm Chelsea-i aotsü atema jembia liasü saka Blues aser Leeds na tsüngda sensaksem tom nung raksatok.

Adams ya manager Andoni Iraola-i iba transfer window nung alizükba asayar tenetbuba lir aser pa midfield nung England nunger U20 asayar Alex Scott den külemi asayatsü, shiba iba ita tetenzüklen Bristol City nungi alizükogo.

Bournemouth-i alizükba midfielder tem rongnung Ivory Coast nunger asayar Hamed Traore Sassuolo nungi aser Netherlands nunger winger Justin Kluivert, Roma nungi alizükogo.

BILEMDANGANG

"Timla agi nisung ka tejakdangi anir."